

# ASUHAN BUDI DI DALAM ISLAM

## Adat dan Sopan Santun

Soal sopan santun, akhlak yang mulia dan budi pekerti yang baik sangatlah tertuntut di dalam Islam, bahkan Junjungan kita Nabi Muhammad *sallāllahu 'alaīhi wasalam* adalah diutus kerana menyempurnakan sopan santun, budi pekerti dan akhlak yang terpuji. Makalah yang kami hidangkan di sini ialah buah pena Cikgu Abdul Hamid, Parit, Perak, mengupas dengan lanjut soal kesopanan terhadap ibu bapa, jiran tetangga, masyarakat dan seterusnya-pengarang Qalam.

(Oleh: Abdul Hamid, Parit)

Bangsa Melayu ini sebagaimana buminya subur demikian juga kebudayaannya; akan tetapi sayang semakin hari semakin tidak diendahkan lagi adat dan budi bahasa datuk nenek yang mulia itu cuma tinggal saki-bakinya sahaja, itupun seumpama embun di hujung rumput. Jadi hal ini bertepatanlah seperti serangkai pantun tua demikian bunyinya:

Seri perangus hatinya dakar

Tubuhnya tambun berkasut jerami

Bumi hangus lautan terbakar

Embus setitik memadam api.

Adat itu erti dalam-dalamnya di sisi masyarakat ialah undang-undang atau peraturan hidup untuk keselamatan masyarakat. Orang Melayu sentiasa menyebut “adat lembaga” ertinya undang-undang yang diaturkan atau pertubuhan undang-undang dan biasa juga disebut “adat resam” ertinya undang-undang yang diresamkan. Maka perkataan “hidup dikandung adat” itu ialah hidup secara berperaturan pada tiap-tiap tempat dan masa demikian jua: “Biar mati anak jangan mati adat” menurut

erti yang seluas-luasnya undang-undang itu tegak berdiri membela walaupun anak sendiri yang salah. Sanya jika disemak dengan cermat kita dapati beberapa talābī, tamsīl, sindir, ibarat, perumpamaan, pepatah, dan kiasan yang tajam-tajam untuk membentuk masyarakat supaya sentiasa masyarakat itu menjadi sempurna sepanjang masa. Dengan keterangan ini dapatlah diketahui kesudahan kesopanan Melayu dalam masyarakat. Sengaja dibahagikan sesunan rencana ini kepada 10 bahagian iaitu:

(1) Ibu bapa, (2) Ibu, (3) Bapa,

(4) Jiran, (5) Guru, (6) Masyarakat,

(7) Makan minum, (8) Suami, (9) Isteri,

(10) Pakai patut.

Tujuan yang besar mempelajari adab itu ialah membersihkan budi pekerti atau perangai dan fikiran daripada segala keburukan yang membawa kepada cacat dan keji di alam masyarakat, dan mempelajari ilmu adablah

boleh seseorang menapis dan mengasingkan di antara buruk dengan baik, antara betul dan salah. Manakala seorang itu telah mengetahui segala perbezaan itu dapatlah ia berjalan di atas landasan kesopanan dan meninggalkan lembahan keburukan hingga jadilah segala perkataan dan perbuatannya (budi pekerti) pujian dan kegemaran orang ramai, apalagi jika orang itu di barisan pendidik, pengajur. Ibu bapa amatlah ter mestinya mempunyai pakaian adab itu kerana mereka itu adalah sebagai acuan kuih yang akan merupakan kuih yang sempurna. Oleh kerana tabiat alam, lebih memberi kesan perbuatan itu daripada percakapan. "Satu perbuatan lebih berkesan daripada seribu percakapan"- kata peribahasa.

## Kesopanan kepada ibu bapa

Ibu bapa yang tersangat banyak membuat jasanya kepada anak lebih daripada lain-lain: mereka berpenant lelah memelihara anak dengan beberapa susah payah melayan anak. Berhujan panas hingga meleleh alit di kepingan mereka mencari makan. Pada waktu anak sakit mereka menangis berikhtiar mencari ubat, atau mereka tiada makanan apabila si anak lapar, mereka berikhtiar serta berdoa atas kesejahteraan anak sepanjang masa jika berjauhan dari mata, supaya anaknya maju di dalam kelengkang hidup. Anak itu di sisi ibu bapa ialah setinggi-tinggi mutu dan harta yang tak ternilai harganya.

Ibu bapa tak gentar-gentar dan jemu-jemu memarah dan menasihat anaknya apabila anaknya melakukan sesuatu yang melanggar kesopanan yang di luar garisan kemanusiaan, istimewa apabila mereka telah tua tetapi semuanya itu dipandangnya oleh anak suatu cerewet dan sia-sia belaka. Alangkah banyak dan besarnya budi serta jasa mereka terhadap anaknya?

Ketahuilah wahai remaja belia bahawa ibu bapa yang begitu sengsara membela anak, sekali-kali bukannya dengan terpaksa atau tergagah demikian jua bukan dengan jelak-melainkan dengan sukacita dan riang sepenuh cinta dan kasih sayang yang tertanam di dalam tabiat semula jadi mereka yang didorong oleh Tuhan.

Sekianlah ringkas dari pandangan cinta ibu bapa kepada anak. Oleh itu anak-anak itu tiada selayaknya derhaka kepada ibu bapa sebagaimana beberapa kejadian yang telah didapati. Kelakuan yang begini selain daripada melanggar garisan kemanusiaan si anak itu melanggar perintah Tuhan. Si anak ini lupa yang ia pada suatu hari kelak akan menjadi ibu bapa; tak boleh tiada akan menuai apa yang telah ditanaminya dengan tangan durjana sendiri.

Kalau seseorang daripada mereka itu, atau kedua-keduanya telah tua maka engkau berkata "Ah" (cis, atau ceh), dan janganlah engkau keluarkan kepada mereka itu perkataan yang kasar, remaja belia yang bersifat seperti di atas dia akan bertemu dengan balasan di dunia ini, kerana Nabi telah bersabda: " Dua kejahanan akan dibalas oleh Tuhan di dunia: berzina dan derhaka kepada ibu bapa."

Sekarang ketahuilah kita, sanya melakukan kesopanan kepada ibu bapa itu disetujui oleh agama-itulah dia yang diperbilangkap oleh orang-orang tua "adat bersendi syarak".

Cara yang mulia wajib anak-anak lakukan kepada ibu bapa setiap-tiap hari dan tempat seperti berikut:

1. Merendah diri dengan kasih sayang yang sejati.
2. Berkakuan lemah lembut dan sopan santun.
3. Berkata-kata dengan mereka itu dengan perkataan yang mulia dan lemak manis.
4. Menyambut tegur ajar dengan ikhlas dan muka yang manis.
5. Membantu mereka itu tatkala susah payah.

6. Menziarahi mereka itu pada hari yang tertentukan dan pada waktu-waktu yang lain.

7. Dan lain-lain.

Kesopanan kepada ibu.

Di atas sudah diumumkan kepada anak-anak peraturan dan gaya kesopanan keoda ibu bapa dengan pendek.

Di sini ditunjukkan pula betapa sepatah kata itu dimulakan dengan ibu kemudian beredar dengan bapa. Anak-anak yang beribu tentu rasa dan ketahui sendiri tidak ada manusia semasa kecilnya yang rapat dan hampir lebih daripada ibu. Itulah sahabat yang karib sekali dan ibulah guru yang awal-awal melatih seseorang mulai di atas pengakuan sehingga besar dan tua. Anak-anak semasa kecil ibulah memberi makan minum, ibulah menidurkan dan memandikan, menjahit dan menampung pakaian yang koyak. Bila-bila keputusan belanja kepada ibu bapa jua anak-anak merayu meminta wang. Ibu-ibu yang miskin dan melarat tiap-tiap malam bergelumang dengan najis (berak-kencing) sekalian itulah tidak menjadi jijik kepadanya melainkan sebaliknya.

Sekianlah ibu menanggung sengsara taka da lebih berat daripada itu. Lain pula penat jerih yang dirasai ibu bapa waktu mengandung hingga menzahirkan anak boleh hidup dan besar.

Tiadalah dapat sebarang otak melukiskan bagaimana tingginya darjat ibu melainkan anak yang mempunyai akal yang siuman dapat menimang sendiri. Tidak ada kasih yang dapat diucapkan kecuali sentiasa hendaklah taat kepadanya. Di dalam pandangan agama Islam pangkat ibu itu adalah seperti dalam hadis: Ada seorang meminta izin kepada Rasulullah mengikut perang. Maka Rasulullah bersabda: "Adakah engkau mempunyai ibu?" jawabnya "ada". Maka Rasulullah bersabda "Jagalah ibumu kerana syurga itu ada di bawah kakinya". Pada lain riwayat Rasulullah memberi penerangan pula terhadap

kelebihan dan perdampingan ibu bapa dengan anak-anak begini bunyinya:

Datang seorang lelaki kepada Rasulullah lalu bertanya,

siapakah yang lebih mendapat persahabatan dari saya?

Sabda Rasulullah: Ibumu. Ia bertanya:

Kemudian daripada itu siapa? Jawabnya: Ibumu. Ia bertanya: Kemudian daripada itu siapa? Jawabnya: Bapamu.

Kepada sekali remaja belia hadis ini wajiblah menjadi hujah mengapa tiga kali berulang-ulang Nabi bersabda demikian? Bagi menerangkan ibu itu selain daripada yang dikatakan di atas sahabat yang ikhlas, ibu itu tidak sekali-kali menaruh hasad, khianat, zalim, dan lain-lain.

Sifat yang akan membinasakan anak: Oleh yang demikian tidakkah wajib kepada anak berkelakuan lemah lembut dan kasih sayang yang bersungguh-sungguh? Sentiasa membuat kebajikan yang diredhai oleh agama, akal dan kemanusiaan; jauhkan daripada merosakkan hatinya walaupun sekecik-kecil perkara. Jika macam mana banyak pun kesenangan seseorang anak telah diberikan kepada ibu tidak sekali-kali cukup dan pada lamun dibandingkan dengan jasa membela anak-anak itu dengan harapan supaya panjang umur dan menjadi bertambah-tambah mulia, akan tetapi anak-anak ada sebaliknya. Kesopanan kepada bapa

Adab tertib anak kepada bapa tiada pula kurang seperti juu kepada ibu, cuma cara-caranya berlainan. Di dalam masa ibu seorang melayan anak-anak di urmah sesungguhnya bapa itulah pula menyelenggara segala perkara di luar.

Bolehlah dimisalkan ibu itu: laksana menteri dalam dan bapa itu laksana menteri luar" yang menanggung sekalian hajat rumah, di atas bapalah kewajipan berat ringan, dari sekecil-kecil benda sampai sebesar-besarnya oleh itu terpaksalah seseorang bapa membanting tulang untuk kehidupan isi rumahnya tiada takut

hujan dan panas, tiada kenal susah dan payah asalkan buah hatinya menjadi cergas dan sihat apabila besar akhirnya menjadi berguna kepada masyarakat bangsa dan tanpa air. Setelah anak-anak dapat begitu besar budi bapa yang dicurahkan kepada anak dari dalam buaian terus menerus seklgi jiwa dikandung badan untuk menyelamatkan anak dari sebarang cedera, tiadalah ada jalan lain kepada anak-anak hanya mesti tumpukan setia dan menerima sebarang nasihat bapa, istimewa pula wajib jangan dukacitakan hatinya dan diputuskan percintaannya.

Dengarlah Junjungan besar bersabda maksudnya: "Keredhaan Tuhan bergantung dengan keredhaan bapa dan kemurkaan Tuhan bergantung dengan kemurkaan bapa."

Daripada hadis ini anak-anak yang berakal dapatlah kesimpulan:

Kebahagiaan itu berkait dengan menerima keredhaan bapa.

Setelah ditunjukkan kesopanan anak-anak kepada kedua ibu bapa janganlah pula hendaknya anak-anak itu khali dan lupa mementingkan pertolongan apa yang boleh ditolong kepada saudara mara kepada ibu bapanya dan beradab tertib yang tidak kurang sebagaimana ibu bapa sendiri demikian juga saudara-saudara tua (lelaki dan perempuan) dan sekalian orang-orang tua.

Bahawa dengan keadaan demikianlah bangsa kita tentu menjadi mulia dan bersatu padu yang sejati. Kembali seperti sediakala kepada ilmu keselamatan yang kelak menepatilah seperti perumpamaan yang mengatakan: Hati gajah sama dilapah, hati kuman sama dicicah. Cuba anak-anak sekalian dengar dan cuba pula anak-anak semua membuka lembaran tarikh yang berubah dalam zaman kebesaran Melayu dahulu betapa rasa cinta kasih sayang di antara keluarga merata-rata teluk rantau dan negeri meskipun orang sekarang menamakan zaman kolot atau gelap tetapi mereka terikat dengan sekukuh-kukuhnya yang tiada tangan dapat merobaknya apakah sebabnya? Tiada yang lain melainkan nenek moyang

bangsa kita dahulu itu memelihara kebudayaan dan kesopanan mereka. Itulah perhiasan yang tak lekang-lekang di sekitar tampat. Jika tidak akan menjadi lanjut, akan ditulis beberapa talabi, perumpamaan dan pepatah yang membina dan bersemangat tetapi di sini dirakamkan dengan ringkas sahaja:

Ringen sama dijinjing berat sama dipikul.

Gunung sama didaki lurah sama dituruti.

Laksana telur dua sebandung pecah satu pecah kedua.

Kesopanan kepada jiran

Di sini dibentangkan pula kesopanan kepada jiran yang tiada pula kurang pentingnya di dalam masyarakat. Jiran itu perkataan Arab yang telah sebatи dengan lidah bangsa Melayu; tetapi telah difaham dengan sempit sahaja iaitu Cuma diertikan: Orang-orang yang berhampiran dengan rumah atau di sekeliling rumah yang seagama dan sebangsa dan sekampung sahaja lain bukan. Yang betulnya tidak demikian. Dengarlah seperti yang di bawah ini:

Apa yang berlaku di rumah seseorang tiap-tiap hari senang susah mujur, malang, sebagaimana biasanya kejadian pada manusia, jiran kitalah yang tahu dan merekalah lebih dahulu menghulur tangan kemurahan membantu kita dan merekalah yang mula-mula memerah otak jika pada perkara otak dan pecah peluh ditentang tulang urat bekerja apa yang boleh dibuatnya. Yang demikian seharusnya sentiasa kita berbaik sangka, tegur sapa, ramah mesra yang memangnya patut begitu kerana selain daripada keluarga dan orang-orang yang tinggal serumah dengan kita tidak ada siapa yang lebih rapat melainkan jiran kita. Oleh itu tidakkah mestinya kita berlaku baik antara satu dengan yang lain. Sanya orang yang begitu hampir apabila tidak ada perhubungan kasih sayang yang tulus nescaya rosaklah pergaulan dan lenyaplah keamanan. Manusia tak boleh hidup seperti enau di dalam belukar dan hidup memencil sahaja. Kita hendaklah

sedar dan ketahui. Adalah kesenangan itu tergantung dengan mereka yang di sisi kita dan di sebelah menyebelah kita.

Barang ketahuilah kiranya wahai sekalian anak-anak dan remaja belia di dalam soal jiran ini bukannya di dalam adat budi bahasa kita sahaja yang dituntut, bahkan di dalam Islam bermacam-macam cara telah diatur dan disusun, supaya tidak menjadi kesamaran dihidangkan dengan ringkasnya seperti berikut:

1. Janganlah ia meminjam kita pinjamkan.
2. Jika ia meminta tolong kita tolongkan.
3. Jika ia sakit kita lawati.
4. Jika ia dapat kesenangan kita girangkan dia.
5. Jika ia dapat kemalangan kita hibur kendi, bukan dengan muzik tetapi dengan kata-kata yang menyenangkan.
6. Jika ia mati kita turuti jenazahnya.
7. Kita tak boleh dirikan rumah tinggi daripada rumahnya kecuali dengan izinnya – supaya ia tidak terlindung daripada udara dan matahari.
8. Jangan diberi bau makanan tetapi bagilah isinya.

Alangkah besarnya dan alangkah tingginya nilai dan kesopanan kita. Tetapi dengan putaran musim pancaroba rata-rata orang tak mengendahkan lagi budi bahasanya yang memandu bangsa dan kaum kepada bersatu padu.,

Suatu lagi jangan sekali-kali malu menghidangkan kepada jiran kita walaupun sedikit. Sebaliknya jiran juga ditegah menghina hadiah itu. Kalau rasanya hati alang ke palang pemberian dibagikan, jangan sekali-kali ditunjukkan terutama kepada anak-anak jiran itu.

Peraturan yang begitu bagusnya dan begitu mulia kalau dijalankan betul-betul dan diperhati dengan saksama sudah tentu kedudukan masyarakat bangsa kita maju dan teratur.

Sekadar yang ditulis itu belumlah selesai erti jiran meskipun sekian lama diertikan hanya kepada seagama dan sebangsa sahaja. Agama Islam tidak membenci kepada agama dan bangsa lain-lain. Agama Islam satu agama yang meutamakan pergaulan dan mementingkan masyarakat. Sepanjang masa ajaran Islam menyuruh menabur budi, budilah penawar yang mujarab. Supaya menjadi contoh ketinggian Islam: Di dalam sejarah tak kurang Nabi Muhammad bersahabat dan melayangkan surat persahabatan dengan negeri sekelilingnya terkadang ada kala agama lain menolong dan memberi hadiah kepada Baginda. Kepada anak-anak sekalian dipinta tatap riwayat ini:

Kata Mujahid: Pada suatu hari aku duduk bersama-sama Abdullah bin Umar manakala seorang daripada hambanya menguliti kambing; ia pun berkata kepada hambanya: “Apabila daging telah habis menguliti kambing, bagilah dahulu daging itu untuk jiran kita yahudi.” Ia berkata demikian itu berulang-ulang. Maka jawab hambanya: “Telah banyak kali tuan hamba berulang-ulang.”

Lalu sahut “Rasulullah sentiasa berpesan kepada aku di dalam hal jiran hingga aku takut melupakan dia. Riwayat ini tak perlu diulas lagi terangnya laksana tahi lalat di muka comel. Sebelum disudahi dengarlah perumpamaan Melayu: Naik ramai bertburu orang. Dengan satu riwayat dan beberapa pertunjuk yang di atas timbanglah oleh anak-anak dan remaja belia sendiri dengan timbangan yang sederhana. Adat budi bahasanya itu mengajar kita supaya berkemanusiaan yang sempurna serta sentosa dan sejahtera selamanya.

Agama Islam sangat-sangat memelihara dan menjaga perhubungan antara seorang seorang manusia. Dengan berlainan iktikad dan kepercayaan di dalam agama tidak ada jalan boleh diputuskan masyarakat. Sekali-kali tak diharuskan ada tabir yang mendindingkan seorang dengan

lainnya. Anak wajib mengaku ibu bapanya walaupun keduan-dua orang tuanya itu berlainan agama. Di dalam sesuatu perperangan Abu Bakar bertemu muka dengan orang tuanya dengan tidak lengah lagi sahabat yang tersebut tampil ke hadapan hendak memalu bapanya, tetapi kejadian ini ditegah oleh Rasulullah, apda hal bapanya beragama Musyrikin.

Suatu kisah lagi: Siti Asma' bertanya Rasul-Allah: Ibu saya menyembah berhala datang kepada saya meminta pertolongan, bolehkah saya menolongnya, jawab Rasul-Allah "Jangan engkau putuskan perhubungan ibumu".  
Insaf dan sedarlah wahai bangsaku Melayu!

#### Kesopanan kepada guru

Di dalam ceraian ini dihidangkan pula kesopanan murid-murid kepada guru, sekalipun ditempatkan pada bilangan yang kelima ini tetapi kebesaran dan ketinggian darjah guru bukanlah bererti rendah martabatnya daripada ibu bapa sekali-kali tidak! Melainkan jika hendak dibezakan antara guru dengan ibu bapa itu adalah laksana permata yang bertakhta di cincin hanya tempatnya berasing-asing jari-jauharilah yang mengenal manikam.

Oleh kerana itulah pendita-pendita yang arif bijaksana pernah menyusun suatu gurindam yang sedap rentak gelamanya demikian ujarnya: Aku dahulu mengutamakan guruku daripada bapaku, meskipun aku mencapai kehidupan dari bapaku; tetapi guru itu memeliharkan roh.  
Ada pun roh itu umpama mutiara dan sungguhpun bapa itu menyelenggarakan jasad pada hal jasad itu laksana gewang.

Daripada misalan dan gurindam ini tak dapat tiada segala murid-murid dan remaja belia mengaku gurulah memimpin manusia ke alam bahagia daripada kalam zulumat kejahilan, kerana sudah menjadi peraturan hidup bahawa segala

orang yang bermaksud baik dan berkehendak kesucian jiwanya. tak dapat tiada mesti mengadap guru, di lidah gurulah dapat pengertian dan fahaman atau dengan lain perkataan gurulah memgang anak kunci pengetahuan dan rahsia pelajaran, kalau bukan sebab-sebab itu dunia tidak berhajat kepada guru lagi. Orang-orang dahulu tersangatlah mereka menghormati guru dan menaruh kepercayaan penuh kepada guru hingga ada meninggalkan kata yang berharga yang tak boleh dilupakan sebagai cogan kebangsaan "Parut yang dipalu guru itu menjadi pelita di dalam kubur". Sekiranya anak-anak yang melwan ibu bapa itu dikatakan derhaka maka murid-murid yang tiada enteng dan tiada berat kepada guru itu dikatakan tidak berkat, ertinya tiada bertambah ilmu- ini bukankah menjadi suatu kerugian besar? Di dalam Islam ada banyak pengajaran yang menyuruh memuliakan guru, satu daripada sabda Nabi, "Muliakanlah orang yang kamu belajar daripadanya, kerana dengan gurulah hati yang mati menjadi hidup sebagaimana tanah dangkar disuburkan oleh air."

Beberapa orang yang liar kelakuan telah bertukar kepada santun sopan dan beberapa orang yang bodoh pada mulanya kemudian menjadi pintar dan pandai. Demikianlah mulianya guru, beliau bukan kadar dapat memimpin sesama jenisnya yakni manusia bahkan binatang yang buas dan bias dijinakkannya akhirnya menurut ajarannya. Hal ini adalah suatu keajaiban yang sentiasa mesti dimenungkan pada hal binatang-binatang itu termeterai di kejadian semula jadinya suatu tabiat yang tersangat berlainan dengan manusia. Bagaimanakah cara dan gayanya memuliakan guru? Iaitu beri ia hormat dan takzim. Ingat budinya yang dihamburkan dengan tiada tahu jemu dan jelak baik pun di hadapannya atau di belakangnya.

-bersambung